


# Deporte Local

Deportistanan cu a briya den 2018

## Xander Bogaerts, Denzel Dumfries y Sarah Quita Offringa



ORANJESTAD (AAN) - Mas mihor no tabata por! Tres di Aruba su atletanan profesional a simplemente briya den 2018. E pelotero Xander Bogaerts y Boston Red Sox ta logra gana e World Series di baseball, e futbolista Denzel Dumfries ta firma cu PSV y ta wordo selecta pa Seleccion Hulandes mientras nos orguyo femenino Sarah Quita Offringa ta gana su di 15 titulo mundial den PWA World Tour.

Xander Bogaerts

Xander Bogaerts y Boston Red Sox ta gana Los Angeles Dodgers cu score di 5-1 den e ultimo wega pa asina segura nan di cuater titulo di "World Series" den e ultimo 15 campeonatonan di Major League Baseball. Xander a bati den 2018 pa un averhae di .288 cu 148 hit y 103 RBI. E logro di Bogaerts a haya hopi elogio riba nos isla unda Gobierno di Aruba a organisa un bunita celebracion pa Xander den Carnival Village na San Nicolas y a nombra Xander como Em-

bahador di Bon Boluntad pa pais Aruba.

Denzel Dumfries  
Ex seleccionado di Aruba, Denzel Dumfries a firma cu e gigantenan di PSV pa un suma di 5,5 milyon euro te cu 2023. Denzel a hunga e ultimo temporada cu SC Heerenveen. Esaki a trece cune cu Dumfries a bay progresa enorme y esaki a cay den bista di entrenador Ronald Koeman cu a selecciona Denzel Dumfries y pone debuta den seleccion Hulandes di futbol contra Alema-


nia. Sin duda esaki tabata e cherry cu tabata falta ariba e bolo. Na e prome invitacion pa entrenador Koeman, ya caba Denzel lo debuta cu Oranje contra Alemania. Dumfries 4 aña pasa ainda a hunga den e seleccion di Aruba pa despues hunga cu e club amateur Barendrecht, sigui pa e club profesionalnan Sparta Rotterdam, SC Heerenveen y PSV Eindhoven.

Sarah Quita Offringa  
Aruba su orguyo Sarah Quita Offringa ta logra su di

15 titulo mundial na Fuerteventura, Islas Canarias.

E orguyo femenino di Aruba ta gana su di 11 titulo mundial den Freestyle y un di dos lugar den Wave, cual ta e prome logro den Wave pa Sarah Quita. E aña aki Sarah Quita a skip slalom pa concentra su mes full den Wave. E aña 2019, Sarah Quita lo kier un bes mas concentra su mes den e disciplina di wave pa asina purba di logra un titulo mundial den esaki.

## E storianan impactante y inspirativo di Rechenel Statie y Alwin Lanoy



ORANJESTAD (AAN) - Den deporte tambe tabata tin su momentonan menos bunita, caminda deportistanan a haya nan sea den un accidente of a pasa den momentonan cu problema cu salud. Entre nan por corda Rechenel Statie y Alwin Lanoy.

Rechenel Statie  
Un milager completo.  
Rechenel Statie ta un milager di Dios. Pa tur esnan cu a sigui e storia di e hoben Statie sa cu su situacion tabata uno hopi delicado mes despues di su accidente horendo cu tiki a dune un chens pa scapa. Richi su gana di biba tabata demasiado grandi. Ayuda pa tur su hendenan rond di dje, e hoben Statie a lucha pa mehora y recupera su salud. Awe casi un anja y algun luna nos por bisa cu Richi ta recuperando den forma satisfactorio.

Saludando Richi, nos mes haya un emocion grandi cu ta pone bo krop pa no cuminsa yora. E tabata un sentimiento increibel pa mira con su progreso di recuperacion a bay. E ta pa-

pia palabra, haci señal cu su mannan y e ta come su so cuminda normal. Den su mirada nos a mira un hoben fuerte y balente cu hopi gana di biba y sin lubida tur esnan cu tur dia ta rond di dje pa yude y cuide. Awor Richi ta na Colombia unda e ta recupera den gran forma. E la opera y tur cos ta bayendo den bon caminda. Bida ta siña nos hopi cos, please ban tene cuenta cu nos prohimo, duna un man, yuda un otro ora mas e mester. Bo recompensa lo bin di halto.

Alwin Lanoy  
Antony Alwin Lanoy di un derame cerebral na 2017 pa un prome lugar den e Ronde van Aruba 2018. Diabierna anochi presenciando tur e 586 participantenan sali for di Mariniers Kazerne na Savaneta esnan presente sin duda tin den nan mente cu e participante aki ta personanan bon di salud, cu semper ta entrena duro y fisicamente den bon condicion. No ta tur hende por cuminsa cu un recorrido di 72km rond di Aruba, e

ta existi mucho mas cu simplemente entrena. Sinembargo tin un persona mei mei di tur e 586 participantenan cu a core e ronde di diabierna pa diasabra kier a comparti su storia cu nos y cu ta casi imposibel pa kere. E persona aki ta Antony Lanoy alias Tony cu e aña aki a core cu e ekipo di Wix & Zeppenfeldt.

Na April 2017(pues net un aña pasa) Tony a haya un derame cerebral (hersenvloeding) cu por poco a coste su bida. Cu hopi urgencia Antony a wordo transporte pa Colombia pa tratamento special caminda e la pasa tres dia den coma. Una bes na Colombia cosnan a bira mas pio caminda Antony a haya hersenvliesontstekking of tambe yama meningitis. Pues dos enfermedad hopi grandi y grave cu no tin duda cu tiki hende lo scapa



di esakinan. Pero suerte di bida a toca Antony mientras su perseverancia y fe pa sigui biba tabata demasiado grandi. Una bes cu e la sali for di peliger di bida, e la lucha y bringa te final pa hasi locual mas e gusta. Cu ayudo di su famia, amigo y conocirnan e la pone metanan su dilanti pa mehora y recupera su estado di salud 100 por ciento. Cu hopi terapia, motivacion y pasenshi Tony tabata determina pa bira e persona di antes bek. No tin duda cu diabierna na e di 26 edicion di Ronde van Aruba, Antony Lanoy a cuminsa cu un reto cu tiki lo durf di cuminsa cune sigur mirando kiko a pasa apenas 1 aña prome. Apoya

pa su team consisti di Franc Tomassau, Doede, Marlon Jansen y Paul cu tabata e driver, Antony tabata determina pa caba e di 26 edicion di e Ronde van Aruba den bon forma y locual a pasa tambe. Diasabra anochi Antony y su team Wix & Zeppenfeldt a logra conquista e prome lugar den e prestigioso Ronde van Aruba 2018 den e categoria 160 - 200 aña di edad. Cu e hazaña aki sin duda Antony Lanoy ta fuente di inspiracion pa hopi di nos. E dicho di "Never ever give up" ta mas cu na su lugar aki. Un palabra di pabien na Antony Lanoy, su famia, amigo y conocirnan.